

17.november 2020

UKA2020/113

Qimmit qimuttut Qeqertarsuarmiittut 2017 kingorna piaqqiaasut tamarmik DNA-kkut misissortinnissaannik Naalackersuisut peqquneqarnissaannik Inatsisartuni aalajangiiffigisassatut siunnersuut. DNA-kkut misissuinerup takutissavaa qimminik akusaqalersimanersoq. Naalackersuisut peqquneqassapputtaaq qimminik akusanik nassaartoqarpat, qimmimik akusamik piginnittoq qimmiutini akusaasoq toqukkusunneraa paasiniassallugu.(Inatsisartunut ilaasortaq Doris J. Jensen, Siumut)

Qimmitta qimuttup allanik akuneqarani ulloq manna tikillugu inuussutissarsiutigineqarluni kulturik-kullu ilisarnaatitaa pingaernerit ilaattut inissisimasooq assorsuaq tulluusimaarutaavoq.

Namineq qimmilimmiuulluni perorluni assut qimmerpalaq aammalu qimussertut isigalugit peqataaffigalugillu inuunermi nukittunerulersitsinermik aammalu kinaassutsimut annertuumik tunniussaarsimasooq oqaatigisinnaavara. Nunap, inuup uumasullu suleqatigiilluni ataqatigiinnera ataqqinarnerusumik ersiutissaqanngilaq.

Qimmip qimuttut Qeqertarsuarmi akusaarpalulersimanerata tusarlerneqarnerup kingorna inuiattut tupaallannartutut tusakkatut taasariaqarpoq. Soorluttaaq kinaassuserput, eriangisarput aammalu iluatigisarput aserorneqarparluttutullusooq tusarluni. Taama qimmerput qimuttoq inuiaqatigiittut pingaaruteqartigisimasumik inissisimasooq. Taannaqanngippat inuiaasugut nunatsinni inuungin-narsinnaasimanatalu nunarput inoqassanngikkalarpoq.

Aalisarneq, piniarneq sikukkut qimussimik angallanneq aammalumi takornarissanik qimussimik angallasserit tassaapput ullumikkut nunatta aningaasaqarniarneranut annertuumik inissisimatsisooq pinngitsoorneqarsinnaanngitsoq. Isumaqarluinnarpunga aalisartut qimussimik assartuisut, qimussimik aalisartut tassaasariaqartut tunisinerminni immikkut akigitsinneqartunik pitsaaneruseqartut inissisimasariaqartut nunarsuarmioqatigiinnut oqaatigineqarsinnaalluni aalisagaq pisarineqartoq motor-ilersorfiunngitsumik, minguinneqarpat qimmit qimuttunit qimussimillu nukimmik tunngaveqartumik tulaanneqarsimasooq. Markedsfør-ingimi tassalu nittarsaassinerminni annertuumik iluaqutigissuarput tamarmik iluaqutissaat. Qimussertartunut, aalisartunut, akitigut, isigineqarnikkut, avatangiisinut kulturitsinnullu. Win-win.

Qimmeq qimuttoq illersorusunnaqaaq. Siunnersuuteqartup siunnersuutigaa qimmit qimuttut DNA-kkut tamarmik misissorneqartalissasut naalackersuisut peqquneqassasut. Peqqusisoqassapat inatsimmik tunngaveqartariaqarpoq. Inatsit tamanna piunngilaq aammalu sulit taama ittumik nunatsinni atuutilersitsisooqarsimanngilaq, qaqqinneqartarsimananilu.

Nunatta Qitornai

Inatsisartuni



Qimmillit oqartussaassuseqanngitsutut inissinneqarsinnaanngillat unnerluussisussaataasoq inatsimmik tunngaveqarani misissuititsisoqalissagaluarput. Innuttaasut inatsisitigut aammalu qimmillit inatsisitigut illersugaanerit pigisaannik akulerunneq inerteqqutaammat. Naalackersuisut inerteqqutaasunut akulerutsinniarneqarsinnaanngilaq peqqullugit inatsimmik tunngaveqanngitsut iliuuseqarfigeqqullugit.

Siuliani unnerluussisussaataasunut suliakkiutigineqararluarmat tamanna unnerluussisussaasunit itigartitsissutigineqarpoq inatsit tunngavissaasinnaasoq sinaakkusiinngimmat.

Inuttut ataasiakkaatut aammalu innuttaasutut kulturitsinnik eriaginninneq tunngavigalugu tamatta illersugassavut illersortussaavagut, aamma qimmitta akuneqannginnissaat qulakkeerniarlugu.

Siunissami naalackersuisut inatsisissamik saqqummiussinissaat qilanaarnarpoq aammalu toqqissimanarpoq siunissamut isigisumik inatsisigut eqqanaarinninniartoqarmat qimminut piginnittunullu iluaqutinngorlugu.

Siunnersuut itigartipparput.